

ԱՐՑԱԽԻ ՀԱՆՐԱՊԵՏՈՒԹՅԱՆ ԿԱՌԱՎԱՐՈՒԹՅՈՒՆ

ՈՐՈՇՈՒՄ

«11» մայիսի 2023 թվական

N 338-Ա

ք.Ստեփանակերտ

ԱՐՑԱԽԻ ՀԱՆՐԱՊԵՏՈՒԹՅԱՆ ԿԱՌԱՎԱՐՈՒԹՅԱՆ 2020 ԹՎԱԿԱՆԻ ՄԱՐՏԻ 19-Ի N 180-Ա ՈՐՈՇՄԱՆ ՄԵՋ ՓՈՓՈԽՈՒԹՅՈՒՆ ԿԱՏԱՐԵԼՈՒ ՄԱՍԻՆ

Հիմք ընդունելով «Նորմատիվ իրավական ակտերի մասին» օրենքի 37-րդ հոդվածը՝ Արցախի Հանրապետության կառավարությունը **որոշում է**.

1. Արցախի Հանրապետության կառավարության 2020 թվականի մարտի 19-ի «Արցախի Հանրապետությունում անասնապահության զարգացման խթանման ծրագիրը հաստատելու մասին» N 180-Ա որոշման 1-ին կետով հաստատված հավելվածը շարադրել նոր խմբագրությամբ՝ համաձայն հավելվածի:

2. Սույն որոշումն ուժի մեջ է մտնում հաստատման պահից:

«Հաստատում եմ»

ԱՐՑԱԽԻ ՀԱՆՐԱՊԵՏՈՒԹՅԱՆ
ՆԱԽԱԳԱՀ

Ա.ՀԱՐՈՒԹՅՈՒՆՅԱՆ

Հավելված
Արցախի Հանրապետության կառավարության
2023 թվականի մայիսի 11-ի
N 338-Ա որոշման

«Հավելված
Արցախի Հանրապետության կառավարության
2020 թվականի մարտի 19-ի
N 180-Ա որոշման

ԾՐԱԳԻՐ

**ԱՐՑԱԽԻ ՀԱՆՐԱՊԵՏՈՒԹՅՈՒՆՈՒՄ ԱՆԱՍՆԱՊԱՀՈՒԹՅԱՆ ԶԱՐԳԱՑՄԱՆ
ԽԹԱՆՄԱՆ**

ՆԵՐԱԾՈՒԹՅՈՒՆ

Գյուղատնտեսական կենդանիների ընտելացումից անցել է ավելի քան 10 000 տարի: Պատմական այդ հսկայական ժամանակաշրջանում մարդկային հասարակությունն ապրել է զարգացման բավականին շատ էտապներ և հասել նյութական ու հոգևոր մշակույթի ժամանակակից մակարդակին, բայց և այնպես, այսօր, ինչպես միշտ, նրա գոյության համար նյութական բարիքների ստացման հիմնական աղբյուրներից մեկը շարունակում է մնալ անասնապահությունը:

Անասնապահության նշանակությունը ժողովրդական տնտեսությունում չի սպառվում արժեքավոր սննդամթերքների՝ մսի, կաթի, յուղի, ձվի և այլնի արտադրությամբ, շատ կարևոր է բարձրորակ հումքի՝ բրդի, կաշվի, մորթու և այլնի ստացումը, գյուղատնտեսական կենդանիների՝ իբրև բանող ուժի օգտագործումը և օրգանական պարարտանյութերի ստացումն ու օգտագործումը դաշտավարության և գյուղատնտեսական մշակաբույսերի բերքատվության բարձրացման մեջ:

Անասնապահությունը հանդիսանում է աշխարհի բոլոր երկրների տնտեսության առավել կարևոր ճյուղերից մեկը: Անասնապահության զարգացման, անասնապահական առատ և անարատ մթերքների արտադրության խնդիրը և դրա լուծմամբ պայմանավորված անասնաբուծության զարգացումը միշտ էլ եղել է գյուղատնտեսության ոլորտում իրականացվող քաղաքականության գերակայություններից:

Անասնապահության զարգացման, մթերատվության բարձրացման գործում առանձնակի կարևորվում է առաջավոր տեխնոլոգիաների և գիտական փորձերի կիրառման դերը, ժամանակակից տեխնիկական և տեխնոլոգիական զինվածությունը:

Արցախի Հանրապետությունում անասնապահության զարգացման համար ոիսկեր են առաջացնում՝

1) անբավարար կերային բազան, դրա մեջ անհրաժեշտ սննդատարրերի և վիտամինների բացակայությունը.

2) անասնաշենքերի պայմանների ու հիգիենայի ոչ բավարար մակարդակը,

3) կենդանիների պահվածքի և խնամքի կանոնների խախտումները.

4) անասնաբուժական և անասնաբուժական միջոցառումների ժամանակին չիրականացնելը.

5) մարդկանց կողմից կենդանիների բուժման անհարկի միջամտությունը և շփումները:

Արցախի Հանրապետությունում անասնապահության զարգացման խթանման ծրագրով (այսուհետ՝ Ծրագիր) ներկայացվում են անասնազվխաքանակի ավելացման շարժառիթով պայմանավորված անասնաբուծության մեքենայացմանը, անասնաշենքերի էլեկտրաֆիկացմանը, մշտական հոսող խմելու ջրով ապահովմանը, ինչպես նաև անասնաշենքերի մաքրությունն ապահովելու նպատակով հարմարությունների ստեղծմանն ուղղված իրականացվելիք միջոցառումները և ակնկալվող արդյունքները:

Ծրագրում օգտագործվող հիմնական հասկացություններն են՝

1) **անասնաշենք՝** գյուղատնտեսական կենդանիներ պահելու համար նախատեսված գետնափոր, կիսագետնափոր, վերգետնյա, ժայռափոր, քարե և (կամ) փայտե կառույց.

2) **գյուղատնտեսական կենդանիներ**՝ խոշոր և մանր եղջերավոր կենդանիներ (տավար, գոմեշ, ոչխար, այծ), խոզ, ձի, ջորի, ավանակ, ճագար, հավ, հնդկահավ, բադ, սագ և այլն.

3) **գյուղատնտեսական կենդանիների պահվածք**՝ մարդու հսկողության ներքո կենդանիների խնամքի միջոցառումների համալիր, որը ներառում է տեղաբաշխումը, կերակրումը, զոոհիգիենիկ պայմանների ստեղծումը, օրվա ռեժիմի պահպանումը.

4) **Էլեկտրաֆիկացում**՝ անասնաշենքերի էլեկտրաէներգիայով ապահովում.

5) **ջրաֆիկացում**՝ անասնաշենքերի և հարակից արոտավայրերում՝ կենդանիների խմելու և սանիտարահիգիենիկ մի շարք աշխատանքների իրականացման համար մշտական հոսող ջրով ապահովում:

Անասնազխաքանակի մեկ պայմանական գլխի հաշվառման գործակիցները հետևյալն են՝ կով, արտադրող ցուլ՝ 1, խոշոր եղջերավոր կենդանիների սեռահասակային այլ խմբերի կենդանի՝ 0.66, մանր եղջերավոր կենդանի՝ 0.1, խոզ՝ 0.3, թռչուն՝ 0.025, միասնաբակավոր կենդանիներ՝ 1, ճագար՝ 0.05:

1. ԾՐԱԳՐԻ ՆՊԱՏԱԿԸ ԵՎ ԽՆԴԻՐՆԵՐԸ

1. Ներկայումս անասնաբուծության զարգացմանը խոչընդոտող գործոնները հետևյալն են.

1) կերարտադրության ոչ բավարար մակարդակը և միակողմանի բնույթը.

2) գյուղատնտեսական կենդանու պահվածքի, բուժման և որակական բարելավման ժամանակակից տեխնոլոգիաներով ներդրման հնարավորությունների բացակայությունը.

3) մատղաշի ստացման և աճեցման համար համապատասխան պայմանների բացակայությունը, ինչպես նաև նախրի վերարտադրության տեխնոլոգիական խախտումները.

4) նախրում անասնաբուժական և տոհմային հաշվառման ընդհատվածությունը.

5) կենդանիների թերկերակրման հետևանքով ցածր մթերատվությունը.

6) կովերի մեքենայական կթի բացակայությունը.

7) գյուղատնտեսական կենդանիների արոտային պահվածքի ժամկետի ոչ հիմնավորված երկարաձգումը:

2. Ծրագրի նպատակը Արցախի Հանրապետությունում առկա անասնաշենքերի նոր տեխնոլոգիաներով արդիականացումն է, անասնաշենքերի ողջ պոտենցիալի լիարժեք օգտագործումը և համակարգային մոտեցմամբ, մրցունակ և արդյունավետ անասնաբուծություն ունենալը, ինչն իր հերթին կնպաստի Արցախի Հանրապետության գյուղատնտեսության զարգացմանը:

3. Նշված նպատակին հասնելու համար անհրաժեշտ է լուծել հետևյալ խնդիրները՝

1) մեքենայացնել անասնապահությունը՝ բարձրացնելով աշխատանքի արտադրողականությունը.

2) նպաստել անասնաշենքերի պոտենցիալի լիարժեք օգտագործմանը.

3) նպաստել անասնապահական հումքի և նյութերի ռացիոնալ օգտագործմանը.

4) բարձրացնել անասնապահական արտադրանքի որակը.

5) ապահովել արտադրանքի ինքնարժեքի նվազեցումը.

6) ապահովել անասնաշենքերի էլեկտրաֆիկացումը և մշտական հոսող խմելու ջրի առկայությունը.

7) ստեղծել հարմարություններ անասնաշենքերում մաքրության ապահովման համար.

8) ստեղծել հարմար նախադրյալներ անասնապահությամբ զբաղվողների անասնապահական ֆերմաներում շուրջօրյա կացության նվազագույն պայմաններն ապահովելու համար:

Անասնապահության խթանման զարգացման գործում առկա դժվարությունները հիմնականում պայմանավորված են անասնապահությամբ զբաղվող սուբյեկտների և գյուղացիական տնտեսությունների ֆինանսական սուղ հնարավորություններով, անասնապահության մեքենայացման միջոցների բարձր գներով, իսկ տվյալ դժվարությունների հաղթահարման հիմնական միջոցը պետական աջակցության մեխանիզմների ավելացումն ու տվյալ ենթակառուցվածքների հետագա զարգացումն է:

2. ԾՐԱԳՐԻ ԻՐԱԿԱՆԱՑՄԱՆՆ ՈՒՂՂՎԱԾ ՄԻՋՈՑԱՌՈՒՄՆԵՐԸ

4. Ծրագրի շրջանակում իրականացված ուսումնասիրությունները ցույց են տվել, որ Արցախի Հանրապետությունում առկա անասնաշենքերը լիարժեք չեն օգտագործվում, հիմնականում էլեկտրաֆիկացված չեն, անասնաշենքերում աշխատանքներն իրականացվում են մարդկային ռեսուրսի հաշվին՝ ավելացնելով մարդկանց շփումը կենդանաբուժական մթերքների ստացմանը, անասնաշենքերն ապահովված չեն կենդանիների խմելու, ինչպես նաև անասնաշենքերի մաքրության և հարմարավետության համար մշտական հոսող ջրով:

5. Անասնապահության մեջ ձեռքի ուժի մեքենայացված աշխատանքով փոխարինման, անասնապահական աշխատանքի ավելի արդյունավետ դարձման, անասնապահին ծանր, աշխատատար և հոգնեցուցիչ աշխատանքից ազատման համար անհրաժեշտ է իրականացնել հետևյալ միջոցառումները՝

1) անասնաշենքերի էլեկտրաֆիկացում՝

ա. էլեկտրաֆիկացում էլեկտրագծերով.

բ. էլեկտրաֆիկացում արևային էներգիայով.

գ. ենթակայանների ձեռքբերում և տեղադրում.

2) անասնաշենքերի ջրաֆիկացում՝

ա. ակունքի կառուցում, վերակառուցում.

բ. ջրագծերի անցկացում.

գ. նովերի, ջրի տարողությունների կառուցում և (կամ) տեղադրում:

6. Ծրագրի շրջանակում միջոցառումները կիրականացվեն այն շահառուների համար, որոնք տնօրինում են տասը և ավելի պայմանական գլուխ գյուղատնտեսական կենդանիներ և անասնաբուծությունն իրականացնում են Արցախի Հանրապետության կառավարության 2018 թվականի մայիսի 21-ի N 391-Ն որոշմամբ հաստատված անասնաբուծությանը ներկայացվող պարտադիր պահանջներին համապատասխան:

7. Ծրագրի շրջանակում պետական աջակցություն տրամադրվում է յուրաքանչյուր պայմանական գլուխ գյուղատնտեսական կենդանու հաշվով առավելագույնը 70 000 ՀՀ

դրամի չափով, որից 90 տոկոսը՝ պետական միջոցներով անհատույց, իսկ 10 տոկոսը՝ հայտատուն սեփական միջոցներով վճարում է շինարարություն իրականացնող ընկերությանը:

8. Եթե անասնաշենքի էլեկտրաֆիկացման և (կամ) ջրաֆիկացման աշխատանքների կատարման արժեքը համաձայն փորձաքննության ենթարկված նախագծանախահաշվային փաստաթղթերի կազմում է առավելագույնը 1 000 000 ՀՀ դրամ, ապա այդ շահառուին տրամադրվում են անհատույց դրամական միջոցներ՝ փաստացի կատարված աշխատանքների արժեքի 90 տոկոսի չափով:

9. Անասնազլխաքանակի ավելացման հնարավորության դեպքում պետական աջակցության չափը յուրաքանչյուր ավելացող պայմանական գլուխ գյուղատնտեսական կենդանու հաշվով կհաշվարկվի նույնպես 70 000 ՀՀ դրամով՝ սույն ծրագրի 7-րդ և 8-րդ կետերում նշված պայմաններով:

10. Անասնազլխաքանակի ավելացման դեպքում շահառուների համար կսահմանվի կենդանիների պայմանական զլխաքանակի ավելացման ժամանակացույց՝ համաձայն N 2 ձևի:

11. Յուրաքանչյուր անասնաշենքի մասով կատարվելիք աշխատանքների արժեքը տրամադրվող պետական աջակցության չափը գերազանցելու դեպքում, գերազանցող մասի չափով աշխատանքները պետք է իրականացվեն հայտատուների միջոցներով:

12. Ծրագրի շրջանակում պետական աջակցությունը նույն անասնաշենքի համար կարող է իրականացվել միայն մեկ անգամ նույն ծառայության դիմաց:

13. Արցախի Հանրապետության գյուղատնտեսության նախարարությունը (այսուհետ՝ նախարարություն) համակարգում և վերահսկում է Ծրագրով նախատեսվող միջոցառումների իրականացման գործընթացը:

14. Հայտատուները նախարարության կողմից սահմանված ժամկետում նախարարություն են ներկայացնում հայտ՝ համաձայն N 1 ձևի՝ նշելով գործունեության իրականացման վայրի, պայմանների, պահվող անասնազլխաքանակի և անասնազլխաքանակի ավելացման հնարավորությունների մասին տեղեկությունները:

15. Հայտերի հետ միաժամանակ՝ հայտատուները նախարարություն են ներկայացնում անասնաշենքերի նկատմամբ գույքային իրավունքների պետական գրանցման վկայականների և անձնագրերի պատճենները: Անասնաշենքերի նկատմամբ գույքային իրավունքների պետական գրանցման վկայականի բացակայության դեպքում սույն Ծրագրից օգտվելու պարտադիր պայման է հանդիսանում վարչակազմի կամ համայնքի ղեկավարի կողմից տրված տեղեկանքը՝ անասնաշենքը տվյալ հայտատուի կողմից փաստացի օգտագործվելու վերաբերյալ:

16. Անասնաշենքերի նկատմամբ ընդհանուր համատեղ կամ բաժնային սեփականության, վարձակալության կամ անհատույց օտագործման իրավունքների առկայության դեպքում հայտատուները նախարարություն են ներկայացնում նաև սեփականատիրոջ (համասեփականատերերի) գրավոր համաձայնությունը անասնաշենքերի սույն Ծրագրի շրջանակներում նպատակային օգտագործման վերաբերյալ:

17. Անասնաշենքի նկատմամբ վարձակալության և անհատույց օգտագործման իրավունքի պետական գրանցման վկայականի գործողության ժամկետը հայտ ներկայացնելու պահին չի կարող պակաս լինել հինգ տարուց:

18. Արցախի Հանրապետության գյուղատնտեսության նախարարի (այսուհետ՝ նախարար) հրամանով նախարարություն դիմած հայտատուների ներկայացրած հայտերի ուսումնասիրման նպատակով ստեղծվում է հանձնաժողով:

19. Յուրաքանչյուր հայտ ներկայացնելուց հետո՝ հանձնաժողովը տասնհինգօրյա ժամկետում ստուգում է ներկայացված փաստաթղթերի հավաստիությունը, անասնաշենքի համապատասխանությունը առկա և ավելացվող պայմանական անասնազխաքանակի հետ, էլեկտրաֆիկացման և (կամ) ջրաֆիկացման հնարավորություններն ու պայմանները և տալիս եզրակացություն տվյալ տեղանքում Ծրագրի իրականացման նպատակահարամարության մասին:

20. Հանձնաժողովի տված դրական եզրակացության դեպքում՝ հայտատուն 35 աշխատանքային օրվա ընթացքում նախարարություն է ներկայացնում անասնաշենքի էլեկտրաֆիկացման և (կամ) ջրաֆիկացման աշխատանքների փորձաքննություն անցած նախագծանախահաշվային փաստաթղթերը, էլեկտրամատակարարման և ջրամատակարարման տեխնիկական պայմանները, ենթակառուցվածքների տեղադրման համար հողհատկացման և (կամ) ջրօգտագործման թույլտվության վերաբերյալ համայնքի ավագանու որոշումը:

21. Նախարարությունը ներկայացված փաստաթղթերի հիման վրա՝

1) ընդհանրացնում է դրական եզրակացություն ստացած հայտատուների ցանկը՝ նշելով յուրաքանչյուր անասնաշենքի մասով կատարվելիք աշխատանքների ծավալները, անհատույց և հայտատուի կողմից վճարման ենթակա գումարները պետական աջակցության գործընթացն ապահովելու նպատակով:

2) Ծրագրի 8-րդ կետում նշված դեպքերում հայտատուների հետ կնքում է ֆինանսական միջոցների անհատույց տրամադրման պայմանագրեր՝ նախատեսելով նախագծանախահաշվային փաստաթղթերով նախատեսված աշխատանքների կատարման պայմանները և ժամկետները սահմանող դրույթներ:

3) դրական եզրակացություն ստացած հայտատուների և լիցենզավորված իրավաբանական անձի կամ անհատ ձեռնարկատիրոջ (այսուհետ՝ ընկերություններ) հետ տասնհինգօրյա ժամկետում կնքվում են համապատասխան պայմանագրեր՝ հաշվի առնելով սույն Ծրագրի 10-րդ, 28-րդ և 31-րդ կետերով նախատեսված դրույթները:

22. Կատարվելիք աշխատանքների արժեքը տրամադրվելիք պետական աջակցության չափը գերազանցելու դեպքում (բացառությամբ սույն Ծրագրի 8-րդ կետում նշված դեպքերի)՝ եռակողմ պայմանագրով նախատեսվում է հայտատուի կողմից առաջին փուլով իրականացնել 7-րդ և 11-րդ կետերով սահմանված սեփական միջոցներով անհրաժեշտ ներդրումները:

23. Նախարարությունը կազմակերպում է մասնագիտական որակավորում ունեցող անձի կողմից պայմանագրային հիմունքներով օբյեկտի շինմոնտաժային աշխատանքների նկատմամբ տեխնիկական հսկողության ծառայության մատուցումը՝ պետական բյուջեով նախատեսված միջոցներով:

24. Ավարտված աշխատանքների ընդունումն իրականացնում է նախարարի կողմից ստեղծված հանձնաժողովը:

25. Կառուցված ենթակառուցվածքների (էլեկտրագծերի, ենթակայանների, արևային էներգահամակարգերի և ջրագծերի) նկատմամբ սեփականության իրավունքն անցնում է հայտատուին՝ հինգ տարի նպատակային օգտագործելու և չօտարելու դեպքում:

26. Կառուցված ենթակառուցվածքների նկատմամբ սեփականության իրավունքը հաստատելուց հետո հայտատուն մեկ ամսվա ընթացքում նախարարություն է ներկայացնում մասնագիտացված կազմակերպության հետ կնքված սպասարկման պայմանագրի պատճենը:

27. Ծրագրի շրջանակում կառուցված էլեկտրագծերի, էլեկտրական ենթակայանների շահագործման ընթացքում, համակարգում հաշվարկված կորուստները ենթակա են հատուցման շահառուների կողմից:

28. Պետական աջակցությամբ կատարվող աշխատանքների ավարտից հետո հայտատուի կողմից առնվազն հինգ տարի տվյալ անասնաշենքում պետք է ապահովվի նպատակային անասնաբուժական գործունեությունը:

29. Ծրագրի նախատեսված աշխատանքների ավարտից հետո հայտատուները պարտավորվում են հանձնաժողովի սահմանած չափով օգտագործել անասնաշենքերի հնարավորությունները՝ իրականացնելով նաև ավելացվող գլխաքանակի համալրում՝ շրջանային անասնաբուժական սպասարկման կայաններին պարտադիր տեղեկացմամբ:

30. Անասնաշենքի հնարավորությունների ամբողջությամբ օգտագործումը հավաստվում է համայնքի ղեկավարի և համայնքը սպասարկող անասնաբույժի կողմից տրված տեղեկանքներով:

31. Ծրագրի 6-րդ, 10-րդ և 28-րդ կետերով նախատեսված և պայմանագրով ամրագրված պայմաններով և ժամկետներում աշխատանքների չիրականացման դեպքում կառուցված ենթակառուցվածքների նկատմամբ սեփականության իրավունքն անցնում է պետությանը կամ պետական աջակցության գումարը վերադարձվում է պետական բյուջե:

3. ԾՐԱԳՐԻ ԻՐԱԿԱՆԱՑՈՒՄԻՑ ԱԿՆԿԱԼՎՈՂ ԱՐԴՅՈՒՆՔՆԵՐԸ

32. Անասնապահությունն աստիճանաբար փոխադրվում է արդյունաբերական հիմքերի վրա: Անասնապահության զարգացման մեջ զգալի արդյունքների գրանցումը հնարավոր է իրագործել միայն առաջադիմական տեխնոլոգիաների ներդրմամբ, անասնաշենքերում աշխատանքների հատուկ ինժեներական կազմակերպմամբ, գործընթացների տեխնոլոգիական գծերի համակարգային մեքենայացմամբ, որոնց համար խոչընդոտներ է ստեղծում էլեկտրաէներգիայի և ջրի բացակայությունը:

33. Սույն Ծրագրի իրականացման արդյունքում՝

1) նախադրյալներ կստեղծվեն նորագույն մեխանիզմների կիրառմամբ անասնապահության մեջ տնտեսավարողների եկամուտների ավելացման համար.

2) հնարավորություն կընձեռվի անասնաշենքերը ապահովել էլեկտրաէներգիայով և ջրով՝ նախադրյալներ ստեղծելով մատչելի մեխանիզմներով անասնապահության մեքենայացմամբ առավել անվտանգ սննդամթերքի արտադրության համար.

3) անասնապահության մեքենայացման մակարդակի բարձրացմամբ՝ տնտեսապես կամրապնդվեն շահառու անասնապահական տնտեսությունները և

պայմաններ կստեղծվեն վերջիններիս կողմից ապրանքային արտադրության կազմակերպման և հետագա զարգացման համար.

4) գյուղատնտեսական կենդանիների պահվածքի համար նպաստավոր պայմանների ապահովմամբ կհասնենք անասնապահական մթերքների արտադրության շահավետ կազմակերպմանը, արտադրության ծավալների ավելացմանը, կենդանիների մթերատվության բարձրացմանը, նրանց անկորուստ վերարտադրության ապահովմանը, հիվանդությունների դեմ պայքարի արդյունավետ իրականացմանը:»:

**ԱՐՑԱԽԻ ՀԱՆՐԱՊԵՏՈՒԹՅԱՆ ՆԱԽԱԳԱՀԻ
ԱՇԽԱՏԱԿԱԶՄԻ ԿԱՌԱՎԱՐՈՒԹՅԱՆ ԳՈՐԾԵՐԻ
ԿԱՌԱՎԱՐՉՈՒԹՅԱՆ ՊԵՏ**

Ա. ԼԱԶԱՐՅԱՆ

Ձև N 1

**Արցախի Հանրապետության գյուղատնտեսության
նախարարություն**

Հ Ա Յ Տ

Բնակության վայրը (գտնվելու վայրը),

հեռախոսահամարը _____

Անձնագրի սերիա և հանրային ծառայությունների համարանիշը (պետական գրանցման կամ հաշվառման համարը) _____

Գործունեության իրականացման վայրը _____

Անասնաշենքի նկատմամբ իրավունքը հաստատող փաստաթղթի համարը _____

Առկա անասնազլխաքանակը _____ գլուխ

(կենդանու տեսակը)

Անասնազլխաքանակը հնարավոր է ավելացնել _____ գլուխ

Ընդամենը _____ պայմանական գլուխ:

Դիմում եմ Ձեզ «Արցախի Հանրապետությունում անասնապահության զարգացման խթանման» ծրագրի (ընտրել միջոցառումը) (անասնաշենքի էլեկտրաֆիկացում էլեկտրագծերով, էլեկտրաֆիկացում արևային էներգիայով, ենթակայանների ձեռքբերում և տեղադրում, անասնաշենքերի ջրաֆիկացում՝ ակունքի կառուցում, վերակառուցում, ջրագծերի անցկացում, նովերի, ջրի տարողությունների կառուցում և (կամ) տեղադրում) միջոցառման շահառու հանդիսանալու համար:

Հայտին կից ներկայացվում են՝

1. _____
2. _____
3. _____
4. _____
5. _____
6. _____

Լրացուցիչ տեղեկություններ _____

_____ (անունը, ազգանունը /անվանումը)

_____ (ստորագրությունը)

Կ.Տ.

« _____ » _____ 20__ թ.

202 թվականի _____ -ին
կնքված N _____ պայմանագրի

**ԿԵՆԴԱՆԻՆԵՐԻ ՊԱՅՄԱՆԱԿԱՆ ԳԼԽԱՔԱՆԱԿԻ ԱՎԵԼԱՑՄԱՆ
ԺԱՄԱՆԱԿԱՑՈՒՅՑ**

Գործունեության վայրը	Առկա պայմանական գլխաքանակը	Ավելացվող (ծեռքբերվող) գլխաքանակը ըստ տարիների										
		202__թ.		202__թ.		202__թ.		202__թ.		202__թ.		Ընդամենը
		գլուխ	կենդանա տեսակ	գլուխ	կենդանա տեսակ	գլուխ	կենդանա տեսակ	գլուխ	կենդանա տեսակ	գլուխ	կենդանա տեսակ	
		___ պայմ. գլուխ		___ պայմ. գլուխ		___ պայմ. գլուխ		___ պայմ. գլուխ		___ պայմ. գլուխ		

Պատվիրատու

(ս ս Հ)

